



13. august 2008

Inatsisartut Ingerlatsinermut Inatsisaanni § 36, stk. 1 malillugu imaattumik Naalakkersuisunut apeqquteqaateqarpunga:

**Naalakkersuisunut apeqquteqaat 2008-mut aalisagartassiissutinik agguaanermut tunngasoq.**  
(Inatsisartunut ilaasortaq Jens B. Frederiksen, Demokraatit)

**Tunngavigineqartoq:**

5. august 2008 apeqquterpaalunnik North Greenland Seafoodimut tunngasunik Naalakkersuisunut nassiusaqarpunga. Apeqqutit taakku akissuteqarfigineqarnissaat qilanaaraara. Suliamulli tunngasut ingerlaavarsinnarput, taamaattumillu imminut pisinnaatillunga amerlanerusunik apeqquteqaateqassallunga, taamaaliornikkut pineqartumut tunngasut tamarmik qulaarneqassammata.

Aallaqqaatigeriarlara 2008-mut saarullittassiissutinik agguaanermut piviusut nassuiaateqarfigalugit tasungalu tunngasunik aalisagartassiissutit. Naalakkersuisut naqqiissuteqarfigisinnaavaannga paatsuugaqarsimassaguma.

Naalakkersuisut 2008-mut aalajangersaavigisimavaat saarullittassiissutissat kalaallit piginneqatigiiffiit 10.400 tonsiussasut. Aalisartiseqatigiiffiit arfinillit namminneq aalisariuteqartut pisassiissuteqarfigineqarput katillugit 7.000 tonsinik.

Piginneqatigiiffiit pingasut (Tunumi Tsuuddii A/S, Arctic Prime Fisheries Kuummiut aaamma North Greenland Seafood) sinneruttunik 3.400 tonsinik tunineqarput, aalisagartassiissutitaannilli suli pissarsisimanatik.

1. august 2008 Sermitsiaq allappoq, Tunumi Tsuuddii A/S-ip pappiaraatitik Namminersornerullutik Oqartussanut nassiusimagaat akuersissuteqarfigeqqullutik kilisaat "Haki" attartussagunikku.

4. august 2008 KNR'ip nutaarsiassaqqarttisivia nalunaarpoq, Naalakkersuisut siulittaasuata siumut imikkut akuersissuteqarnissaq akuerisimagaa, tamatumalu kingorna North Greenland Seafoodip piginneqatigiiffiup allap kilisaataataa attartorsinnaagaat.

Maannakkullu Naalakkersuisut qinnuigissavakka apeqqutit makku akissuteqarfigeqqullugit

1. Aalisagartassiissutit tunniunneqartarput aalisarnermut inatsimmi § 14 stk. 1 malillugu: "Akuersissuteqaatit piffissami aalajangersimasumi aalisagartassat amerlaanerpaaffissalerlugit tunniunneqartarput." Aalisagartassiissutit akuersissutillu imminnut atammata, uagut paasinninnerput malillugu aalisagartassiissutinik pissarsisoq akuersissuteqarfigineqassaaq nammineq aalisariumminut. Naalakkersuisut qinnuigineqarput piunasaqaatit nassuiaqqullugit, piginneqatigiiffiit qanoq akuersissuteqarfigineqarnissaminut naammassisimassagaat.

2. Tamanut tusagassiissutigineqarpoq ikinnerpaamik piginneqatigiiffiit pingasut suli aalisagartassiis-



sutigineqartut pisisinnaanissaannut akuersissutinik tunineqarsimangitsut, naatsorsuutigineqartorli immikkut akuersissuteqartoqarumaartoq aalisariutinik allanit pigineqartunik atorlutik piisarisinnaanissaannut. Naalakkersuisut qinnuigineqarput immikkut akuersissuteqarnissamut tunngavilersuutit suunersut nassuiaateqarfigeqqullugit, piginneqatigiiffinniit piginneqatigiiffinnut.

3. Piginneqatigiiffinnut taakkununga pingasunut aalisartitseqatigiiffinnullu isumaqatigiissutissamik piareersaasiortoqarsimappat, piginneqatigiiffiit aalisagartassiissutit aalisarsinnaanissaannut, Naalakkersuisut qinnuigineqarput aaqqiissutaasimasut nassuiaateqarfigeqqullugit, taakkununga ilanngullugit isumaqatigiissusiaasimasut aalisarnissaanni naammassillugillu tuniniarneqarneranni aningaasartuutit qanoq matuneqartinniarneqarnersut.
4. KNR-imi 8. august Naalakkersuisut siulittaasuat oqarpoq: *”Aalisartitseqatigiiffiit ingerlalluareersut namminneq aalisariutaateqartut kisimik aalisagartassinneqassanngitsut, eqaatsuunissaq kisaatigaarput, piginneqatigiiffiillu nutaat periarfissikkusuppavut peqataanissaannut nutaamillu aallartinnissaannut.”* Naalakkersuisut siulittaasuat aamma oqarpoq, immikkut akuersissuteqarneq aalisagartassiinerlu isummani malillugu inatsimmi periarfissaqartut. Tamanna tunngavigalugu Naalakkersuisut qinnuigineqarput paragraffit Aalisarnermullu inatsimmi suaniinnersut tikkuuqqullugit, Naalakkersuisut siulittaasuata oqaasiinut tunngavilersusutit.
5. Naalakkersuisut saniatigut qinnuigineqarput nassuiaatigeqqullugu, sooq ingerlatiinnarlugu aalisarnermut inatsimmut allannguutissamik siunnersuuteqannginnersoq, malunnaqimmammi Naalakkersuisut siulittaasuata maannakkut inatsisaasup ilusiligaaanera iluarinngimmagu, tassanimi allasimmamat aalisagartassiissutit nammineq aalisariutaatilinnut tunniunneqartassasut.

Naalakkersuisut qinnuigineqarput apeqquteqaatiit ullut suliffiusut qulit qaangiutsinnagit akissuteqaqqullugit.